



Uunga
Sofia Geisler
Inuit Ataqaigiit sinnerlugit Inatsisartuni ilaasortaq

01-02-2022
Suliap normua. 2021 - 20882

Postboks 930
3900 Nuuk
Tlf. (+299) 34 50 00
Fax (+299) 34 66 66
E-mail: asn@nanoq.gl
www.naalakkersuisut.gl

Pineqaatissiissutit qaffasissusaat pillugu § 37 naapertorlugu apeqqummut nr. 029-2022-mut akissut

Asasara Sofia Geisler

Inatsisartut suleriaasaanni § 37, imm. 1 malillugu Naalakkersuisunut apeqquteqarsimavutit. Naalakkersuisut apeqqummut qujapput, taannalu ataani assilineqarpoq akineqarlunilu.

- 1. Meeqqaanik kinguaassiutitigut atorerluisut sakkortunerusumik pineqaatissinneqartarnissaat siunertaralugu siunnersuut 138/UKA2019 – 138/2020 Inatsisartunit tunuliaqutserneqarpoq. UKA2021 Inatsisartunit taparserneqarpoq Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarnissaat pillugit inatsisissatut siunnersuummut missingiut, tassunga ilaalluni ukiukitsunik pinngitsaaliilluni atoqateqarsimasoqartillugu pineqaatissiissutit sakkortusineqarnissaat.**
- Eqqartuussivinni pineqaatissiisoqartartillugu aalajangiunneqartut qulaani taaneqartut siunertaat naapertorlugu pineqaatissiisoqartarnissaa pillugu Inatsisinut Ministereqarfik sunik iliuuseqareersimanersoq, iliuuseqalersaarnersorlu, pillugit Naalakkersuisut qanoq ilisimatitsisinnaappat?**

Akissut:

Inatsisartuni aalajangiiffigisassatut siunnersuutit qulaani taaneqartut akuersissutigineqarnerisa kinguninguatigut Naalakkersuisut Justitsministereqarfimmut saaffignipput, aalajangiiffigineqartullu naammassineqarnissaat noqqaassutigalugit.

Ilaatigut tamatuma malitsigisaanik Kalaallit Nunaanni eqqartuussisarnermik inatsisip, Kalaallit Nunaanni pinerluttulerinermi inatsisip inatsisillu allat allanngortinneqarnissaannut inatsisissatut siunnersuut sapaatip akunnerani 6-imi Justitsministereqarfiup Folketingimut saqqummiutissavaa. Siunnersuummi § 2, nr. 6-imi § 77, imm. 3-tut aalajangersakkamik ikkussisoqarpoq (§ 77 –imi pinngitsaaliinerit pineqarput), taannalu ima oqaasertaqarpoq:



“Imm. 3. Pineqaatissiissutinik aalajangiisoqartillugu, inatsisinik unioqqutitsinermut atatillugu, unioqqutitsinerlu inummut 18-it inorlugit ukiulimmut iliuuserineqarsimappat, immikkut ittumik kanngunarsaasimaneq pingaartinneqassaaq.”

Siunnersuummi aalajangersakkap atuutilersinneqarnissaata aallartinneqarnissaata 1. juli 2022-imi pinissaa naatsorsuutigineqarpoq.

Tamatuma saniatigut kingullermik ataatsimeeqatigiinnermi 2021-imi decemberimi pisumi, pinerluutinut ilungersunarnerpaanut pinerluttulerinnermi inatsimmi § 147-imi pineqaatissiinermut killissarititaasup ukiunit 10-iniit ukiunut 16-inut qaffanneqarnissaa Naalakkersuisut suli kissaatigigaat, justitsministerimut Nick Hækkerup-imut erseqqissaatigaara.

Inussiarnersumik inuulluaqqusillunga

Naaja H. Nathanielsen